



Cussegliera federala Eveline Widmer- Schlumpf ha giavischà ulteriurs 75 onns da success per il Rumantschs.



Carl Tall, il president da l'URB, ha infurmà davart las acitivitas da l'unìon en la Bassa.

FOTOS L. DEPLAZES

Act d'engraziament a la Svizra

Rumantsch: 75 onns lingua naziunala

■ (anr/ld) Avant gist 75 onns ha il pievel svizzer declarà cun ina maioritad sorprendenta il linguatg rumantsch sco quarta lingua naziunala. Il Radio Rumantsch ha profità da quest di commemorativ per engraziar al pievel svizzer per quest bel act da solidaritad. Da las 06.00 fin las 09.00 ha emess il Radio Rumantsch ina discussiun cun Rumantschs emigrads en la Bassa. En il «Hotel Bären», dasper la chasa federala, ha la moderatura da rtr Georgina Janki fatg attent ils auditors

sin l'emissiun directa ed envidà las Rumantschas ed ils Rumantschs da Berna e conturn da far ina visita al studi mobil. Sco pitschna recumpensa ha rtr offrì in café e cornets. E prenda mira: Diversas personas han profità da quest'ocasiun. Ina vaira surpraisa è stada la visita spontana da cussegliera federala *Eveline Widmer-Schlumpf* che ha transmess in solid e giavischà ulteriurs 75 onns da success per ils Rumantschs, gist avant che cumenzia la sesida emnila dal cussegl federal.

Regords da Rumantschs en la Bassa
Bleras Rumantschas e blers Rumantschs han stuì bandunar sunter la Segunda guerra mundiala lur patria per tshertgar lavur e gudogn en la Bassa. Il Radio Rumantsch ha vulì conuscher da trais emigrads lur experientschas sco Rumantsch en in mund tudestg. *Lucas Deplazes*, collavuratur liber da l'Agentura da novitads rumantscha (anr) – che viva dapi passa 60 onns en la Bassa – è sa regurdà da sias experientschas sco Rumantsch tar la PTT e sco schurnalist a Berna. El ha con-

statà che la simpatia per la quarta lingua saja respectabla en la Bassa. Ils Rumantschs giudan ina gronda simpatia. Sco emprima interpresa naziunala ha la PTT fatg diever dal rumantsch grischun per sa drizzar directamain a la clientella rumantscha. *Rico Valär* che è occupà tar la chanzlia federala ha punctuà la muntada dal rumantsch en l'administraziun federala. Cumbain che ils Rumantschs pon sa drizzar en lur lingua materna a la confederaziun sajan brevs rumantschas plitost raras. *Carl Tall*, il president da

l'Uniun da las Rumantschas e dals Rumantschs en la Bassa (URB), ha dà ina survista da las activitads e punctuà la filosofia da l'URB che promovia la chapientscha vicendaivla cun l'interrumantsch. Oz saja quai difficil da motivar ils cumpatriots da far part d'ina uniun. Cun la musica moderna emprova l'URB da far attent la giuventetgna rumantscha en la Bassa sin la necessitad da represchentar nosa lingua. Tall ha constatà che bleras famiglias giuvnas en la Bassa discurrian rumantsch cun lur uffants.